

四庫全書

集部

欽定四庫全書

集部  
溢水集卷三

詳校官中書臣沈 颺

主事臣呂雲棟覆勘

覆校官中書臣呂雲棟

校對官助教臣汪錫魁

謄錄監生臣黃 佑

欽定四庫全書

淦水集卷二

金 趙秉文 撰

古賦

大椿賦

為黃太守壽  
公劉相甥

於此有物焉既澤而堅既蔓而延託根于無何之鄉垂  
蔭于不土之田柅日月而共友券宇宙而爭年歷春秋  
其幾何羗不知其歲之八千端策筮之繇曰是以江夏  
為鼻祖小山之外孫者耶以孝弟為根本忠信為枝葉

者耶有曄其華富文藻者耶有駢其實茂德業者耶松  
茂柏悅不足以比其壽者耶愚惑不知請以椿言

栖霞賦送道人還山

粵有人兮襲芳華跡城郭兮志煙霞賦言歸兮杳何許  
蹇遲迴兮徒延佇貝闕兮珠宮撫膝上兮絲桐高情兮  
天外歸鴻靈宮兮玉紀玄都兮寶藏祝君王兮萬壽侍  
玉晨兮天上辱莫辱兮多憂樂莫樂兮無求望白雲兮  
歸休三年胡為兮此淹留朝遊兮山南暮遊兮山北徙

倚兮亭上聊逍遙以終日日澹兮清暉臨深兮翠微西  
山扶兮曉釀秋水樂兮朝飢山近兮多白雲昏昏兮承  
宇烟銷兮霧散見恒茂兮遠樹樹斷兮天開鴈翩翩兮  
南渡忽人歸兮鳥盡但空山兮日暮日暮兮浮雲滋目  
極千里兮傷心悲山中兮歸來白首不歸兮何時亂  
曰山中兮煙霞宅翠羽簾兮白玉額友麋鹿兮侶猿  
鶴飲清泉兮坐白石山中兮煙霞衣青天成幄兮白  
露成幃風為襟兮月為佩娛清暉兮淡忘歸山中兮

烟霞語黑霓落手兮醉毫舞蓬萊山兮在何處乘清風  
兮欲歸去

叢臺賦

歲辛亥之孟冬兮余解印而南歸覽全趙之形勝兮弔  
荒臺之故基大行車走以南來兮漳水改道而東馳伊  
川谷之變易兮矧人事之推移獨巋然其凌空兮意神  
物之所護持問父老以陳迹兮猶有雙堦野花之詩也  
噫七雄擾擾虎戰以龍爭兮譬事勢于連雞或爭桑于

延敵兮有以酒薄而名園朝膏血於秦韓之草野兮夕  
暴骨於齊魏之沙陲玩生靈于刀几兮決一旦之雄雌  
得地不足以贖民之命兮忍勞民而築斯方主父變服  
而事威武兮固一世之雄才收中山林胡為未厭兮又  
窺秦室之狼豺歸來置酒延眺八極兮俯不見蕭牆之  
孕哉噫翟丈之夢兆兮讖百年之厲階何苔華之新寵  
兮宴安酖毒之孔懷厭離宮別館之湫隘兮起高臺之  
崔嵬笑章華制度之狹陋兮又况采椽與茅堦輦路縈

紆以雲竦閣道行空而飲霓奏金石于雲端兮悅釣天之夢未迴下仰望而不聞兮微風過而聲哀金輿玉輦君王來其間兮左趙姬而右吳娃朝琴夜筑為王歌舞兮樂未極而哀隨探雀鷩于離宮兮豈憶熊蟠與豹胎痛父子斃于一朝兮人亦念骨肉之瘡痍也古往今來日東月西驚歲律之跳丸悼興亡之奕碁歎趙國之城郭兮變都成邑而變骨成灰慨平原之池館兮高者榛邱下者荒陂狐兔穴于邱陵兮草木深於宮闈地荒第



而獸奔天莽蒼而鳥遲沈顧寂聽心傷思摧但聞蕭條  
之聲非竹非絲迫而聽之乃在乎羽蟲之摩軌與衆竅  
之翕吹也嗚呼臺向時之臺也山川花鳥亦向時之山  
川花鳥也山川花鳥不能知此臺之興廢而臺亦安能  
知人之悲歡而人自悲之然則靚粧袿服臺非以為榮  
也而荒榛斷址臺又奚以辱為然而文王之靈臺燕昭  
之黃金當時稱賢者之樂後世為美談之資而是臺也  
蒙亡國之恥與山木之歌亦臺之不幸而堪嗤且夫今

日之悲昔日之樂也騷人懷之而賦詠行客過之而嘯  
唏嗟舊物之都盡獨天留兮此臺閱千秋兮萬古作龜  
鑑乎方來意者使一日之樂易萬世之譏也而臺亦負  
于後世哉可弔而不咤也亂曰洪波之臺傷周舍於已  
死兮後世之君不能起廉頗于未衰干將之劍忍能誅  
忠魂于李牧兮不能斷讒舌于郭開緊梁棟兮既折噫  
大厦兮將頽非一臺之足悲國無人兮吁可悲

辛亥明

昌二年也

解朝醒賦

少作

心怲怲兮危絃身恍恍兮風船頭岑岑其作惡神昏昏  
其欲眠安得尤物之蕭爽折朝醒為可憐若夫鑿金包  
之嫩馨膾玉縷之芳鮮蛤酒熟而口哆蟹糟醉而臍團  
皆足以扶尊前之顏玉醒座上之逃禪自蕭閑五噫之  
外及涪翁與坡仙或耳目所不際蓋亦畧得而言焉又  
若酪水冰融山黎凍堅剖西瓜之蜃卵烹北蔡之蛟涎亦  
足解五更之渴夢快一嚼于冰泉至若辣蓼之和邪蒿

之醬牛魚之醢鹿尾之漿海東頭鵝正西尾羊雉以大  
保羹以秦王殿以紅腊飯以黃粱然後煎以松風蠚眼  
之湯燃以清泉黃串之香已而龍巖雪谿襍鳥絲而操  
翰墨竹溪黃山揮玉麈而談冰霜却弓彎而謝珠貫屏  
水遠與山長笑五斗于竹林追獨醒于沅湘輾然汗出  
釋然病已亦可謂彼此一時跨鶴于維揚者耶

海青賦

泰和扈從春水作

霜空蕭條塞草先白海樹無枝海雲寡色黯兮遼迥風

悲日匿何驚鳥之不羣超翰波而一息爾其俊氣橫鶩  
英姿傑立頂摩穹蒼翼迅東極鐵鈎利背霜排勁翮角  
膝挿腦細筋入骨顧盼雄毅飛騰滅沒旦寄巢于扶桑  
夕刷羽于碣石于是乃命虞人遡風勢繒繳設萬里足  
繫一枝心折遂投軀以委命恥摧翼以喪節奚奴頭千  
髯官指百時飢飽以喉呼謹寒溫之調適臂不暇弛鈴  
不傳掣猶恐懷林丘夢沙磧恨身繫而子留歎雄孤而  
雌隻也逮其骨肉融性情習遼龍沙入閭闔蒙禁鬻之

專寵叨錦韞之前席思報功於所養甘賈勇于一決既  
而新陽屆候太簇司月陽燄浮冰澌坼水溶溶而還綠  
鵝翩翩而下啞探使星馳屬車雷發千輿隱嶙萬騎飄  
瞥上將幸乎光春之中所以觀民風而宣鬱結龍旂標  
而殿門敞虎旅圍而鼓聲疊忽水擊而驚飛乍雲翔而  
成列玉爪翻臂錦絛下紲初貼水而徐回倏干雲而上  
擊雨血紛紜風毛磔裂象廣寒之試舞紛霓裳之回雪  
似吳宮之教戰驚玉顏之喋血壯如破敵勢甚擒賊至

如關侯義勇張綱奮烈取鯨鯢于堅陳叱豺狼之當轍  
固亦釋豈狐之九尾略狡兔之三穴蓋猶賞驥足之神  
駿且以勸忠於英傑也既而壽杯舉臣工說天威暢皇  
恩決背長楊趨京闕

反小山賦

無塵道人李天英家海壖得小山寶而字之名曰玄  
峰寢作于花陰月竇之間適甚為賦閑閑老人笑曰  
是猶有所待也若知天壤間皆吾几格間一物又何

待輦石于山函花于鼎之為適哉乃為賦反之

嗟石來前孰形子鵠匪山而拳玉立巉然匪溜而消玉  
痕隱然天臺臥雲海濱藉烟幾代子寶幾姓子傳子入  
吾室吾以子賢瓊花晚醉壁月夕眠我家我林吾以子  
便我學我仕吾以子遷子豈吾友吾不子捐石不能對  
請以臆宣自我之石幾世幾年山非吾名石豈子妍聽  
其兩忘其樂也天鏡中之象亦水中之象瓶中之泉即  
澗下之泉吾豈謂寶顧陸之筆不若山林皆吾之畫圖



悅秦巴之音不若禽鳥皆吾之筦絃子以心為物役智  
為衆緣不知無塵桎梏於一峰之玄也空花悞大夫之  
夢庭栢證祖師之禪無一物之非我君其問諸屏山之  
散仙

琅山賦

在易州境俗謂之郎君  
山峯巒秀拔頗似少華

尾箕之精琳琅之英鍾奇孕秀琅山播形帝敕六丁移  
來玉京六鰲負背三山蓬瀛翠兮直上劍拔崢嶸表兮  
獨立霜秋氣橫骨非肉附勢敵天劼岬然而門繚然而

城其門伊何竅鑿巨靈隔山見山翁碧紛青素月夕啓  
白雲晝扃其下雷峽隱隱屹屹石崖嵌空龍門天成孰  
剗孰鑿不騫不崩飛泉中來華擘河傾或遡而流或廻  
而泓下赴兩洪硃轟雷霆百步之外不聞人聲蘊蘊隆  
隆洞潭窈冥石席可踞窪尊可銘浮雲悠悠千古此情  
其城伊何繚以重堙疊嶂環抱中心砥平峨峨而仙峒  
峒而亭有駢斯指有植斯屏摩雲障日韜河映星千態  
萬狀不可殫名李白杜陵巨然道寧九原骨醉千日詎

醒瘦武盡隱老任墨卿一朝擲筆萬里騎鯨崆峒九華  
天台四明迥絕人境虛標仙經神州粵區燕南福庭可  
杖可屨或仕或耕信宿陟降朝昏送迎春山水流秋空  
月明巖泉夜落松風晚清游心太玄何慮何營

感華山懷古賦

有浮而清有濁而寧五岳奠形二華削成是其稟金天  
之秀氣奄西土而作鎮包潼關以為門奄奠乎東井鷄  
首之分岳之尊惟天之柱岳之作世為霖雨岳之崇三

峰如公阿衡周公承天之功厥掌伊何兩分其山聖道

通塞孟孫楊韓厥達伊何蔡

缺

蠲痂上醫鑿國雷扁秦

和其肅如霜其高如秋戚施伊優為山之羞若夫昔之  
所謂具臣者都山岳之權竊雷雨之施壤開千里之奠  
秩視三公之貴危不持而顛不扶則將安用彼相矣且  
夫安昌胡廣之保祿林甫盧杞之竊位其餘刀鋸之餘  
蓋亦未足與議譬猶有干雲遏日之險而不能已山東  
之亂擘山淇河之力而不能障漁陽之騎也向者羸顛

劉蹶天崩地坼九廟灰燼萬里喋血陳吳一呼殺函瓦  
裂莽卓盜國內訐外掣楊李擅權幽陵竊發僖昭播遷  
朱李猖獗而是山也萃寇盜之淵藪為豺狼之窟宅墜  
生靈于塗炭寄性命于鋒鏑與獸為羣以巢為室以木  
為衣以橡為食身為心仇形為影絕惡聞人聲愁見白  
月何辜于天使至此極或曰予知其一未知其二向者  
子房運籌霍光謀謨或啓其心或甚其謀祿產擅權于  
呂其劉我命平勃反正而疏二豎嘯凶既唐而周我命

五龍夾日而輶潼關之敗翳尚父是賴奉天之逼惟西  
平之力奮然大臣力爭而活國屹然如天柱之承西極  
奈何以人事之一跌而為山靈之責有秦川胡老啓齒  
而笑曰日有中昃月有虧盈凡一治一亂乃一昏一明  
福生有基禍生有萌山有朽壤故崩皿有蟲故蠹生謂  
山蓋高浮雲翳之不見其形謂心至靈有物蔽之不見  
其情夫惡直為求讒之媒喜譽為招佞之旌驕奢為重  
歛之階好大為興戎之徵是以古之明王棄是而不營

于以忠直是旌抑讒佞之朋土木不飾杜非議之徵平  
刑釋寃息吁嗟之聲含垢忍恥絕忿怒之兵夫然故心  
定神休嗜慾不生禍亂不作而天下和平夫故亡漢者  
漢也非莽卓也亂唐者唐也非安史也使漢以秦為鑒  
自無兩京之亂使唐以漢為鑒又安有蜀道之竄如何  
以一餉之樂而忘累世之亂也斯言懷古非止一時往  
者不可及來者猶可期

擣蓬賦

釋世累而遠遊兮聊逍遙以徜徉行乎莽渺之野兮歷  
榛蕪之蒼蒼攬騶騶以睨視兮嗟遊魂之何方貴賤榮  
辱杳莫訊兮奚氏族之能詳豈結纓齒劍以身徇難兮  
將嬰疾之適當寧正身守道性宮庭兮抑貪生狗欲以  
自戕以天地為衾枕兮豈必厚螻蟻而薄豺狼上無君  
長下無臣僕兮豈必賤奴隸而尊侯王將蟲臂鼠肝無  
不可兮抑一氣頓盡死灰之不揚萬物皆出入機兮其  
孰為主張聞風仙之高論兮曰死生之未嘗噫造化



之無窮兮何大塊之茫茫千變萬化未始有極兮如宿  
債之湏償老栽松而祖忍兮李探環而姓羊指後期于  
源澤兮悞前生于邢房曾易世而不知兮矧億劫之能  
量歷萬世而一遇大聖兮然後知大夢之何傷黃帝孔  
子不可問兮將質之于玉皇溘哀風予上征兮覲金闕  
而朝寥陽紅雲翳其嬰音兮聞天語之琅琅曰道非有  
物兮物物以彰其上無始兮其大無旁無汨而真兮道  
將汝昌吾以為道兮寄浩劫于延康聞至言而遂徂兮

蹇予將造乎中黃仍羽人于丹邱兮留不死之異鄉聆  
古先王之高風兮屹法海之津梁促千劫于一念兮統  
萬有于毫銖涉流沙而徑西極兮尋白毫之相光曰五  
蘊非汝宅兮四大非汝床毋棄溟渤兮認一浮囊觀恒  
河之不變兮知見性之不亡逮皮膚之脫落兮露法身  
之堂堂根塵淨而性空兮知見而無體常悟形骸之非  
我兮中有不化其存者長惟至人之達觀兮超宇宙而  
高驤以陰陽為晝夜兮以死生為康莊知身外之有身

兮亦芒中之不芒混牆壁與瓦礫兮遍法界而不藏于  
是體妙心玄辭喪慮忘充以法喜之食薰以知見之香  
散以象外之說暢以聲前之章逍遙乎無為之業游戲  
乎寂滅之場普天壤以遐觀吾又安知大小之與彭殤  
也亂曰是身虛空以為量兮堅固不壞如金剛兮孰為  
天壽孰否臧兮翠竹真如非青黃兮枯木龍吟非宮商  
兮眼如鼻口道乃將兮

遊懸泉賦

庚午之歲九月既望趙子與客游于承天之廢闕置酒  
乎妬女祠之側千山暮蒼素月如拭形與影嬉谷響互  
答一談一笑超然自得既而歎曰泉不飛則無聲石不  
聳則無骨山以炁而殺瘦境以夜而增寂四者備矣而  
無勝句以文之境雖奇而不即於是剗虵腹之枝以為  
琴竅鳳膺之管以為笛誦王摩詰韋蘇州之詩所以侑  
此觴而永今夕少焉動乎動息乎息鳴乎鳴嘿乎嘿入  
吾耳者瀏以清歷吾目者森以屹金鼓半空聲在峽中

道娘子之闕潘美所以下河東者耶旗幟盡拔春染木  
末窰井陘之口韓信所以破趙壁者耶迫而察之風落  
山而泉鳴石也二客曰未也向者泉出祠下大如車輪  
下赴絕澗懸流千尺殷晴空之雷霆飛炎天之冰雪六  
年于茲而閼其澤子能酹而出之亦一段之奇特趙子  
曰泉有時而通亦有時而塞豈我見聞有通有塞而此  
見聞復有何物鳩林道人曰物我同源動靜致一反聞  
聞處聞所不及無聞之聞聞性不絕離見見處見亦不

立無見之見見亦不滅今子以耳聽聲未能眼處聞聲  
以眼觀色未能耳處觀色故一泉之見為之惑也歸語  
同僚曰此殆維摩詰也覺而賦之但見山高水深風清  
月白

無盡藏賦

出國門而南驚兮並瀘水而西馳枕房山之東麓兮面  
萬頃之蒼陂得孤亭之爽塏兮納萬象而君之月娟娟  
而照席兮風飄飄而吹衣悵今夕之何夕兮得二友之

追隨于是主說客曰自有天地有此江山如我與君與  
人往還向者與子仰看山俯聽泉明月侍右清風侍前  
侯何啻於萬戶買不費于一錢但恐造物者之怪多取  
不憂他人之我先若乃秋方半夜既寂流光潑永素彩  
沉璧玉虬騰舞金波的皪披蘭泛芷紛紅獵碧送漁舟  
于天末飄隣笛于日夕洗耳盪目清魂涼魄忽然不知  
風乘我而我乘風客為主而主為客也且子以為其樂  
何如也雖然世有汙隆物有成毀向也蕪今也芷向也

亭今也。圯何變化之無常而人事之不恃也。客曰。自俗觀之。有代有謝。自道觀之。無成無毀。君亦知夫物無常時。無心乎。自有觀成。則有成。自未有觀成。則成亦壞矣。自今望昔。則有昔。以來望今。則今亦昔矣。由是觀之。方成方虧。方生方死。雖然。此猶有心于去來見在也。若其無心。則無此矣。且夫水不與風期。風來而水波。山不與月期。月照而山白。庸知夫性空真風。性空真月。是尚有極耶。然則聲塵有盡。所以聲聲者無盡也。色塵有盡。所



以色色者無盡也主人喜曰今而後知乾坤一亭萬物  
一藏吾廬尚無恙也

拙軒賦

宣撫移剌公築室于私第榜之曰拙軒以告閑閑居士  
曰余有拙病似愚而強矯矯亢亢踳踳涼涼人皆喜圓  
已獨喜方將適東溟顧登太行將之陽谷反走寒鄉鬼  
笑揶揄人怒中傷神鑒不能療著蔡不能詳且子以為  
何如可愈而康也居士曰拙者自拙吾不知其短巧者

自巧吾不知其長或善宦而九卿或白首而潛郎以俗  
觀之有窳有良以道觀之孰否孰臧較榮枯于瞬息等  
一夢于黃梁神龜曳尾大勝剗腸漢陰抱瓮焉知洸湯  
蜂以蜜而割蚌以珠而戕錮桓山之石豈若鷄衣之負  
朝陽憶上蔡之犬何如羊裘之釣滄浪天道茫茫何有  
何亡老龜不爛禍延枯桑魯酒水薄邯鄲被殃吉凶無  
朕智不能量鄙夫自私虱處視襦達人大觀物我兩忘  
縱心浩然與道翱翔言未既公笑曰余病良已謝夫子

之愈膏肓也

遊西園賦

九日令辰皆醉趙子獨遊西園蓋故苑同樂之地于時  
天高氣清風物淒厲草綠慘以斷蔓果紅薦而脫蒂若  
乃蓼扃黼閣簷摧檻圯曲池荒而飛螢灌木老而雛雉  
嗟物是而人非何昔榮而今悴既而登高臺俯清泚天  
落鏡中水涵空際物無倒影之心水無涵空之意心與  
境忘境融神會先生一笑而作渺歸鴻于天外

心靜天地之鑑賦

律賦

塵靜萬慮心涵太空廓聖賢之鑑別際天地以融通湛  
一意之虛凝不膠于外極兩間而照燭盡在其中夫靜  
為蹠之君心者形之主無營則萬境俱達有蔽則纖毫  
莫覩鑑明則塵垢之不止心則喻如心靜則天地之流  
通鑑斯有取若乃宇有泰定神無坐馳是非不得以塵  
累利害不能以物移明則遠矣鑑無近斯艮以止之鍵  
五基而不亂復其見也洞萬象以无遺由是照燭無疆

眇綿作炳造化無以遁其跡洪纖無以逃其影良由體  
道之冲宅心以靜何思何慮守一性之宮庭不將不迎  
納萬殊之光景今夫五色亂目不見泰華之形五音亂  
耳不聞雷霆之聲我是以神宇定兮虛而不屈心源淪  
兮靜之徐清天地不能外其照日月不足況其明不然  
曷以揚子著書云潛則神明可測莊周抗論謂虛則純  
白自生豈非心本一源事周萬變定而能慮則慮乃有  
得靜而後應則應不能眩今也守一真于不動之宅閉

六欲以不闕之鍵自然不慮而知不窺而見去智與故  
始符顏子之齋知德與言終契孟軻之辨既而解物之  
懸淵之又淵滌玄覽于心地開虛明于性天故得其粗  
則窮事物形名之理悟其精則得道德性命之傳矣夫  
然後為用智之權救亂于未形作研幾之妙見吉于幾  
先別有不定不亂而心恒如不皦不昧而用自在以虛  
為有對也致虛極則无其對以靜為有待也守靜極則  
絕其待及其至也寂然不足以名之超入圓通之智海



盜水集卷二



欽定四庫全書

淦水集卷三

金 趙秉文 撰

古詩

雜擬十首

朱明變氣候大火回西流六龍整征轡倏忽夏已秋閭  
闔來悲風霜稜被九州豈不念時節歲律聿其周精衛  
填冥海木石安所投獨携美門子高步登崑邱千爍長  
不老永謝區中囚

又

朔風厲嚴氣元雲結層陰霜雪被原野行李寒駸駸  
躅獸強顧驚鳥辭故林路滑踖峻坂綠雲上嶽峯挽藤  
斷人迹反畏蛩然音藜藿不充腸况乃飢飈侵開門望  
晴霽白日肯照臨不憂凍餒逼所懷四海心聊興漆室  
嘆不待雍門琴

又

白日淪西圯滄海無回波四時更代謝奈此遲暮何我

欲制顏光惜无魯陽戈憑高望八荒晴眇迷山阿驚風  
振江海山林無靜柯獸狂走四顧曠野彌絳羅西登廣  
武山北顧望三河蓬蒿蔽極目人少虎狼多喟然發長  
嘆撫劍徒悲歌

又

猗猗南山竹並生凡卉叢歲晏多霜雪見別蕭艾中我  
欲食鷓鴣千歲不一逢留之和律呂截作嶰谷筒一變  
為清商日暮來悲風清泉溉石根上有白雲封虛心抱

靜節知音為誰容不如歸去來一竿釣清澗

又

猗猗竹與桐並生江之潯朝日照孫枝夕風振瑤林鳳  
皇天外來飛下玉山岑栖枝食其實氣類無幽深夔倫  
不世出斤斧倘見尋一截嶰谷管一製薰風琴偶蒙識  
者賞無窮出清音九齡起韶州姜子家海南又如帝室  
寶海底珊瑚金人生有南北此道無古今迢迢龍江上  
鴻鴈萬里心

又

晚菊有正性託根寒水津不隨黃葉秌况爭紫蘭春  
依依抱晚節冷艷排霜晨日暮碧雲滋折花思遠人  
鳴雁不我待霜落日夜新願言重採摘歲晏委荆榛

又

空齋日無事起坐橫鳴琴明月入我牖照見萬古心  
古風不復還中有太古音置琴掛壁上吾道無古今

又

戚戚去故里辛苦從軍行黃沙翳白骨麟閣誰功名西  
北秋風至日暮愁雲生火燒白草岡水斷黃河聲天寒  
馬屯縮仰天為悲鳴男兒貴死難義重鴻毛輕南登彫  
陰坂北望驃騎營注馬千丈坡射鵬萬里程

又

西北有高城來往交河道古來征戰地白骨埋秋草人  
壽非金石生男不待老不敢上譙樓唯恐愁絕倒

又

秦時築上郡漢家事西鄙邊兵塵雨雪血漲黃河水千  
秋百歲後魂魄來遊此一誦古戰場悲風來萬里

澠池行

豪斟巨炙排九楹玉盤醺醖一再行秦王顧指趙王瑟  
屬車天遠邯鄲城侍臣衝冠髮直指秦庭虎賁劍鋒倚  
咸陽山色如死灰邯鄲霸氣清于水引車還避將軍路  
叢爾那容持兩虎君不見世間男兒健如虎一旦焉知  
不如鼠

秋日郊行

瘦馬兀西風節物遽如許  
雀噪晚禾場蝶飛秋菜圃  
桑枯竅呼風槐老皮溜雨  
聞聲不見人隔林撾社鼓

初望少室

好山如佳士洗盡名利塵  
對之歛衽敬可愛不可親  
一水刺我骨一石融我神  
何況三十六峰峰與天隣  
仰看青礧礧俯矚白磷磷  
因之携畫本試寫蒼然真  
三日宿其下舐筆不敢皴  
歸來閉閣臥枕上山橫陳  
題詩追所



見何必如古人

廬巖

龍潭繞石壁鳥道盤青蒼飛泉從中來聲落讀書堂左  
右洒石壁石上含宮商尚疑廬徵君醉騎白鸞翔至今  
明月夜飛下青山長去之五百載邱壑道愈光舉瓢酌  
此水清風益難忘

龍門

洛陽三日雨不見龍門面流水入野田歸雲抱幽巖因

卷三  
尋香山眠遂就石樓飯山川宛如昔白傳不可見

過陸渾

言從陸渾去不過紫芝還鳥飛不盡處夕陽千萬山雲  
起動兼靜水流忙更閒坐待石上月滅沒烟嵐間

至日感事

人言至日一線長我覺至日一線短縫新綻舊不如昔  
身上衣猶慈母線昨日日短猶可長今日衣弊不可綻  
年年至日壽北堂親不在堂衣在眼

遊玉泉山

夙戒遊名山出郊氣已豪薄雲不解事似妬秋山高西  
風為不平約略出林梢林盡湖更寬一鏡涵秋毫披雲  
冠山頂屹如戴山鰲連旬一休沐未覺陟降勞高談到  
晉魏健筆凌風騷玉泉如玉人用舍隨所遭何以侑嘉  
德酌我玉色醪

陪趙文孺路宣叔分韵賦雪

堂堂翰林公清癯如令威雪花對尊酒浩氣先春歸一

還天地素平盡山川  
灑松竹瀉清聲窓戶明幽輝呼童  
設茶具巡檐收落霏清寒入詩腸  
思遠昏鴉飛力除鹽絮俗改事文  
章機後生那辨此顰眉正宜揮請  
看西溪老傳著東坡衣

寄嵐賦雪分韵得素字

閉門三日雪荒城甚無趣  
土屋多平頭雞犬迷牖戶雲  
端高青熒天色易曛暮寒迷日車  
轍清絕坤維柱泉藏凍虺蟄松摧  
老蛟怒餓鷲嚇痴雛飢鷹跡寒兔  
野入市

樵蘇不辨入市路  
蹇驢跼峻坂  
愁見冰河渡  
陽衰理必復  
天地豈終互  
佇看黃雲晴  
飛屑落高樹

望北山雲

浮雲起太行  
六合須臾間  
清風相汲引  
吹我渡榆關  
歲旱不成雨  
悠然歸故山  
向來無心出  
亦復無心還

井陘韓信廟

朝涉滹沱流  
驅馬望太行  
暮投井陘  
宿僕痛馬玄黃地  
瘠靳春色  
山高易夕陽  
暮天飛鳥盡  
佇立向蒼茫

花下墓

山前樹令人看花昔人墓昔人栽花待遊晏花開墓上人何處今年花盡復明年今人復為後人憐酒澆墓上喫不得留與飢鴉作寒食

漸臺行

齊國有四殆漸臺空五層臺成膏血盡鬼力猶不勝浮雲一蔽臨淄君君王左右多青蠅發婦不卹緯杞國憂天崩任從笑掩侍人口仰天大拊列女膺一言反掌易

春風變滛澠吳楚各千里飛鳥不敢凌吳以西子亡齊  
以無鹽興醜興而美亡未易定愛憎請君寶此圖觀國  
如延陵

秋懷次高參軍韵

秋風蕭條秋氣傷歲云暮矣思故鄉客行來歸正落木  
鴈飛不下空斜陽白草岡頭風似箭黃沙戍下月如霜  
聞君近有從軍作愁思與之誰短長

三五七格

秋風清秋月明白露夜深重白雲秋晚輕夢回酒渴呼  
童起枕上轆轤三五聲

倣嚴武臨邊

少年騎馬耳生風老去羞無汗馬功落日秋風心尚壯  
令人回首望雲中

遊箭山

天風吹雪下平田紛紛逐馬銀杯翻馬亦喜風搖玉鐙  
興來不覺過青山青山可望不可攀長河鏡裏開烟鬟



浮雲不見山頂相想是落日孤雲間  
箭山峰頭望碣石  
東南海水不可極六龍竇日半海紅  
長鯨駕浪掀天白  
萬峰回合處九折十三盤一溪初入  
山百轉萬壑度盡  
松聲寒老苔萬古帶石色枯松倒植  
蒼苔裂石門劃斷  
一峰開猶向雲端眺青壁不見長安  
許道寧披麻誰繪  
倚天青又無天上謫仙金鑾客削爪  
詠此晴嵐碧眼前  
安得此窅兀想像造化初開闢詩人  
以來幾人到只說  
終南與嵩少他年騎鶴歸蓬萊仰天  
却笑箭山小

倣太白登覽

扁舟過海島風便一日耳咫尺不可期波濤四十里竭  
來雞山下具浴桃花湯洗盡塵土骨心期雲水鄉夜夢  
掛席南斗旁金山寺影水中央海雲噓蜃化樓閣撞鐘  
擊鼓聞海陽施食狎鷗霑法味啣花馴鹿散天香夕陽  
萬頃鷗沒處水啣天影青茫茫臨風朗詠太白句鳥飛  
不盡吳天長海山道人種白玉碧眼方瞳照崑谷遺我  
天書三十六模糊塵眼不可讀醉乘天上紫玉麟一問

東海青童君天風吹衣毛骨冷銀河倒浸扶桑影麻姑  
兩鬢垂秋霜人間陸海變耕桑歸來笑撫靈松下春風  
幾度桃花謝

閭山懸崑寺觀宇文公吳東山題名

幽州之鎮暨巫閭襟帶遼碣吞玄菟誰開青壁一萬丈  
坐我陸海之方壺有泉聲而飛有松實而腴雲烟出沒  
隨朝鋪三百六十古精廬雲端削出金芙蓉望海寺前  
列幢蓋鎮山亭下羅笙竽廣寧太守來肩輿今日之游

差樂乎問而不答心語口高士例與山相娛壁間題詩  
六君子髣髴記是高蔡吳山僧睨壁笑問吾他山還有  
此客無黃華老人醉騎驢向來亦貌懸崑圖

海月

東方雲海何所無千奇萬怪雄牙鬚風腥雨鹵懶下筋  
盡與海月為僕奴滄波萬古照明月化為團團此尤物  
混然別有一太虛七竅不施斤斧力不辭支解充君需  
照君胸中五車書清光半食入肝肺雄文徑欲誅蟾蜍

一經上下波心白幾誤謫仙淪醉魄為君掛席拾滄海  
海嶽樓頭斫冰雪

海岳樓所隱

松饅

嗟嗟千歲姿不比明堂蒿膚裁三韓扇液製中山醪皮  
毛剝落盡流傳到松饅髯龍脫赤鱗三日浴波濤玉兔  
持玉杵搗此玄霜膏文章百雜碎肪澤滋煎熬殷勤小  
方餅裁以鞍畔刀味甘剖萍實色殷煎櫻桃遼陽富冬  
菹盤饌窮溪毛巧謀一飽地虀粉不我逃腹中十八公

笑汝真老饕未忘口腹累尚似賢蒸羔真休苦硬老家  
風大孤高聊將酥蜜供調戲引兒曹多生根塵習雋永  
勝珍庖一舌有多智無乃綿蕞勞人間無正味嗜好隨  
所遭安能知許事為君續離騷

霜葉

天工設色繪雲屏山光擘破烟嵐青夕陽閃閃見鴉起  
晚風蕭蕭吹客醒林間老僧倚瘦藤一枝秋水冷金瓶  
日暮千畝秋影裏紛紛吹落讀殘經

遊紫霞山

共聯塵外鑣薄遊西山寺夕照返河山秋容滿天地霜  
風失故綠顏色少姿媚黃花似吾衰紅葉如人醉病來  
不舉酒意得同此味纍然似空尊酒盡同棄置

題大令冠軍帖

君不見長安城中永寧里玉軸牙籤散城市流傳人間  
知幾姓墨蠹老蛟蟠不死怪君何處得此本上有大令  
冠軍字嗚呼真贗久不辨咄咄逼人皆李衛至今淳化

二王帖多是唐人所臨硬黃紙想當盤礴下筆時脾睨  
九原呼欲起以燈取影見面觀心知不言識形似長沙  
無人吳郡亡後來作者不到此何必更問當年誰吾言  
久已經平子

黃山云懷素所臨

人日遊西山寺觀謝章壁畫山水

蕭寺荒堂三五間謝章滿壁畫江山天涯霜雪少春意  
一日攜酒開心顏飢禽穿窗啄官粟歲久剝墻樵指禿  
山僧送客不關門寒雲夜夜飛來宿



倣李長吉擊毬行

錦韉珠絡四百蹄，綉曾嵌花雙狻猊。  
分曹入塲鼓聲作，月趁流星馬前落。  
側身下臂疾鳥回，霹靂一聲龍門開。  
玉鞭笑擊金鐙響，綠襦齊出黃金杖。  
臨街下馬坐廣亭，玉盤行酒跪輸朋。  
蒼頭上馬抱黃帕，一點飛塵夕陽下。  
歲暮言懷

歲晏多北風，塞向卧南壁。  
龜紋羃紙帳，規以安我室。  
宇宙豈不寬，盤薄入容膝。  
窓明讀易朝，月冷談道夕。  
風箏

偶成韻一笑付終日嚴城傳夜柝曾是非戎後驚飈動  
河漢原野曠蕭瑟積陰蕩寒氣厯厯星斗白龍鍾感歲  
換留滯眇天北憶昔獨悲辛乾坤同寥閭

冬至

小時逢冬至夜半叩鄰里及今老無事却呼童稚起坐  
深朋友敬甚矣吾衰矣笄女將及人吾衰固其理行年  
四十二始有此兒子未知賢與愚懷抱差可喜嚴冬霽  
霜雪風日稍清美一醉忘其家頽然枕棐几

重九登會禪寺冷翠軒

北風吹倒磨雲峰凜然雙角蟠白龍遶城雪花大如席  
黃花紅葉誰為容會禪西軒作重九登高望遠開心宵  
烟嵐卷盡暮山碧冷雲萬里迷玄鴻山北花豬大如馬  
割鮮飲食如長虹酒酣起舞望兩寺鳥驚踏雪摧長松  
天低日落望不盡一徑何處來樵蹤君不見七金山下  
打圍處貂裘風帽寒蒙茸跑風駿馬下平野迎霜老兔  
咻榛叢歸來得雋託朋友臨風一飲輕千鍾歡餘勝地

兩蕭瑟百年聚散如飛蓬明朝却望登眺處城中唯見  
白雲封

題東坡眉子石硯詩真蹟

東坡袖裏平原手忠義曾藏筆發之世俗臥筆取妍媚  
書意乃似東隣施何曾夢見麒麟兒天骨不似駑駘肥  
傾囊倒軸精妙乃如此世間唯有眉子石硯吾家詩

風琴堂

我家琴寫風入松君家風琴唯隱几月明天籟自宮商

何處安排君十指風動龍吟自不知無絃底處覓成虧  
世間真樂類如此但恐此聲非此耳

聽雪軒

冰花唾琅玕窗外留半月蕭然煮茶興似倩此君說玉  
龍卧無力時送紙牕濕夜久沈無聲風枝墮殘屑

遊崆峒山

圓方相函浩無窮巨細長短相形中至人遺形立於獨  
直與天地相始終不離汾水見姑射心知何處非崆峒

惜哉小智聞道晚強以耳目尋遺蹤去城三十里而遠  
其下問道軒轅宮緣雲一徑羊角上忽得平壤羅諸峰  
悄然坐我白茅室目所未擊神已通青山為身澗水舌  
賓主相對森談鋒是中無問亦無會一墮觀聽真盲聾  
何人意得乃忘象豈必日月推屯蒙參雲亭西山更好  
下視落日低金容歸來秀色灑眉頰夢駕萬里西飛鴻  
題楊秘監畫馬

楊侯詩人寓於畫後身韓幹前身霸驂騮萬匹落入間

一紙千金不當價曾貌先帝麝香驄紙上飛出天池龍  
至今畫史比良樂一洗萬古凡馬空時于畫皮嘆竒蹟  
二百年來無此筆艱難常恨少神駒掩圖獨抱龍媒泣

靈巖寺

泰山天下山方山屹相對何時巨鰲趾中斷神斧快遂  
令齊與魯劃若中作界陽坡青礧礧陰崖白礧礧衆峰  
如環城盤盤一都會一逕入靈崑十里行竿簾飛泉何  
處來石梁納高派金碧閎精藍未到氣先邁鍾魚集萬

指陳迹向千載何人僧伽熬入壁了無礙鐵君豈知道  
証此身不壞異類服猛逸草木動光怪信知象教力超  
越範圍外年來筆墨廢政坐耳目隘不行萬里脚恐負  
三生債濟南山水窟巖寺風烟最乞我一把茅飛身入  
圖畫

江岸艤舟圖

遠村樹如薺近岸洲如月孤舟泊沙尾危檣見木末前  
山景氣佳日暮涼風發時有渡頭人蕭蕭吹素髮



香山飛泉亭

霜風吹林林葉乾泉聲落日毛骨寒道人清曉倚欄干  
自汲清泉掃紅葉一菴冬住白雲端

東坡赤壁圖

連山盤武昌古木參雲稠誅茅東坡下門前江水流永  
懷百世士老氣蓋九州平生忠義心雲濤一扁舟笛聲  
何處來喚月下船頭掬此月中水簸弄人間秋蕩搖波  
中山光中失林邱古今一俯仰共盡隨虬蜉蝣孫曹何足

弔我自造物游尚憐風月好解與耳目謀歸來玉堂夢  
清影寒悠悠一顧能幾何鵲巢奄不留遺像不忍掛尚  
恐兒輩羞儼然袖雙手妙賦疑可求何時謫仙人騎鶴  
下瀛洲相期遊八表一洗區中愁

伯時畫九歌

楚鄉桂子落紛紛江頭日暮天無雲烟濃草遠望不盡  
翩翩吹下雲中君九歌歌曲送迎人還將歌曲事靈均  
一聲吹入汨羅去千古秋風愁殺人

倣張志和西塞二首

一葉黃飛一葉舟半竿落日半江秋  
青草渡白蘋洲歸路月明山上頭

又

白頭波上白頭人黃葉渡西黃葉村  
山幾朶酒盈尊落日西風送到門

楊秘監秋江捕魚圖

山蒼蒼江茫茫鳥飛不盡吳天長  
潮平漲落洲渚出秋

風幾含鱸魚鄉漁郎聚魚鳴兩槳輕罾觸破青山浪脩  
鱗出水玉參差晚日搖光金蕩漾長林无聲楓葉丹清  
波不動江水寒誰令此圖落塵土乃是楊侯造化之筆  
端我披此圖四十載老去而今重見畫空留名字落人  
間當日題詩幾人在漁人走利士走名得失與魚相重  
輕笑把綸竿眇滄海浩歌直欲膾長鯨

支遁相馬圖

支郎天機深世故一馬中向來疏筍氣寓物一洗空眼

前無騏驎遠目送歸鴻僧中有良樂萬里籟雲風

倣摩詰獨坐幽篁裏

獨坐幽林下談玄復觀易西日半銜峰返照林間石石上多古苔山花間紅碧花落人不知山空水流出

送李按察十首

豫章蔽牛馬郢匠斧以斯太阿斷犀象補鞮不如錐君子識其大不為流俗移青雲自茲始功業當及時

其二

全齊十萬戶綉衣付儒臣往時佩犢者今日扶犁人潛  
魚逝清波脫兔思荒榛賢哉渤海守盜賊皆吾民

其三

漢儒事章句去道利乃倍桓譚謂子雲此事今獨乃岱  
岳小天下齊魯復何在會當登日觀一目了滄海

其四

好酒無深巷急足無善迹一偽喪百誠中和為士則澤  
中一寸鏡解引萬里色往時王廣道山東化遺德

其五

堂堂竹溪翁如天有五星篆籀深漢魏文章倣六經後  
生翫華蓀骀骀白青善哉劉與李斯文見典刑

其六

西方有佳人貽我白玉琯吹之和八風元氣生虛窾翩  
翩兩青鳥云是王母遣天長道路濶音信何由展

其七

皎皎霜雪練寒女機中出織成天吳鳳被之臧獲質如

何窮鄉士九月猶絺綌不見王逸賓抱窮守空室

其八

君侯下車日百城風凜如公餘一炷香谿山奉晏居治  
要無多言所貴一字虛所以曹相國不讀城旦書

其九

本心如水鏡功名時翳之少焉塵累盡萬象復在茲水  
冷知天寒絃高覺柱危世無齋心友誰知此襟期

其十



二豪角談鋒氣湧胸中山達士兀無言雙手縮袖間理  
勝是非遣道在禽魚閑田也真不愚高風藐難攀

春水行

光春宮外春水生鴛鴦飛下寒猶輕綠衣探使一鞭信  
春風寫入鳴鞘聲龍旂曉日迎天仗小隊長圍圓月樣  
忽聞疊鼓一聲飛輕紋觸破桃花浪內家最愛海東青  
錦鞬掣臂翻青冥晴空一擊雪花墮連延十里風毛腥  
初得頭鶩誇得雋一騎星馳薦陵寢歡聲沸入萬年觴

瓊毛散上千官髻不才無力答陽春羞作長楊侍從臣  
閑與老農歌帝力歡呼一曲太平人

涿郡先主廟二首

炎燼終四百海飛羣雄奔蛟龍離舊隱豺虎瞰中原仗  
義公天下豈料中山孫艱闕拒赤壁顛沛乞荆門劉郎  
非嬌客肯市一女恩譬如韝上鷹既飽則飛翻山陽公  
安在洒淚西南坤區區一隅地鼎立爭雄尊滅魏壯圖  
屈窺吳遺恨存嗚呼永寧宮慷慨臨終言老瞞安足雄

死面覩姦魂仁與不仁耳成敗何必論天乎未厭漢河  
洛不足吞盜手復為盜不乎猶子元等為一亡國善惡  
終不諉

又

當時五丈原墻頭搖羽葆草木尚有情人心不如草緬  
懷車蓋翁三顧隆中老乾坤一草廬鼎足事已了艱危  
奉命際流涕出師表一時會風雲千古事蘋蓼野農復  
何如尚說官家好筵卜傳神語瓦釜薦行潦瀘水耕餘

村汜陽行處道天留西日遲地狹東風早風霜慘燕鴈  
歲月愁蜀鳥亦復梁父吟塵埃驚潦倒

扈從行

馬翻翻車轆轤塵土難分真面目年年扈從春水行裁  
染春山波漾綠綠韉珠勒大羽箭少年將軍面如玉車  
中小婦聽鳴鞭遙認飛塵郎馬足朝隨鼓聲起暮逐旂  
尾宿樂事從今相繼躅聖皇歲歲萬幾暇春水園鷺秋  
射鹿

從帥府謁太清宮

層宮枕蒼陂地迥風日冷旌旗隱復見原陸互馳騁  
悠塵外趣窅窅壺中境山川蒸淑氣草木闕清景周  
疆有楚宋漢隸到鐘鼎尚矣千歲檜荒哉九龍井惓  
竒目以擊契冥心獨省悲歡萬古促賞晤一日永清  
波燮魚尾落日頽牛領天寒鷹隼擊水落鴻鴈影白  
日照征夫青天入漁艇洗兵江漢清茲焉事幽屏

遊醉翁亭

一徑入幽谷磴迂景更延  
陽光時翳竹日色寫冷泉  
不見琅玕寺心知白雲邊  
殘僧戀幽景斷臂初非禪  
歲暮少風雪回祿稍擅權  
海內有此亭奪去寧非天  
中有不壞者斷碑猶宛然  
逋民半吳越過客多幽燕  
樹根落斷崖聊掛從軍鞭  
鳥啼空落日野色愁寒烟  
月上人歸盡山空水濺濺

陽冰篆

護書如護兒救燎如救飢  
可笑亦可憐似高還似癡  
為

此陽水篆法傳承斯長楸感騏驎快劍斫蛟螭  
祖廟器袞冕巖廊姿夜光含圭角春水變華滋  
觀物獨寫妙苦心人得知入石疑無筆妙處君  
獨窺廬陵千載人嘆此尤崛奇一旦隨灰燼世  
疑嶧山肥成壤固有數惜哉徒爾為永成吾不  
預既壞那可追當其將壞時萬一神護持一物  
尚不忍其餘可類推乃知放麇翁仁心不吾欺

送墨李道士元老

嵩山到嵩陽相望三百里數驛走商嶺兩崖夾伊水飛  
烟空翠間前路轉多山雲橫碧嶂斷鴈沒青天還鳥鳴  
青山上人行修竹裏犬吠得柴荆花落鳥驚起草荒摩  
詰野火斷魯山碑昔疑王家畫今信謝公詩其中一道  
士生計蒼烟壁松下讀道經窓間寫周易相看斗南北  
不見十年餘重尋化鶴夢要寫換驚書雲間待玉皇日  
下瞻天表歸去杖頭邊乾坤一壺小君歸我正病病起  
霜滿鬚尚能持酒否還憶寄書無遙知鳴臯下尚有蒼



苔迹讀我往年詩因之拂塵壁

送李天英下第

天鷄拂滄溟萬里起古色南風搖古雨歸興生羽翼二  
年客京華一第為親屈文字天地讐風雲囚霹靂鸞皇  
望霄漢騏驎絆荆棘蹭蹬升天行白雲繫胸臆遙憐弟  
妹長摩頂今過滕人生在家樂絕勝長為客老夫懷抱  
惡數日臥向壁胷中略雲夢眼底無敵國雲歸北海後  
鳥沒青山夕目斷東北塵茫茫如有失

與龐才卿雨中同遊太寧山

羣山西來高崔嵬太寧萬疊屏風開半天截斷參井分

夕陽不到吟詩臺

寺有吟詩臺馮瀛王寓筆研于此

近都形勝甲天下

況此萬斛藏璫瑰青蛟百道走玉骨下赴僧界如奔雷  
泉聲夜作雨飛來冷雨滴破烟嵐堆栢梯可望不可到  
石鱗冷滑沾莓苔塔上一鈴時獨語慎勿促裝遽如許  
徑須攜被上方眠明日顛崖看懸乳寺後一峰高更寒  
歸來駐馬更重看蕭蕭易水寒流廣蒼茫不見雲中山

西風栗葉高陽道澹澹長空沒歸鳥  
荆卿廟前濕暮螢  
昭王臺畔霑秋草擬豁千秋萬古愁  
更須一上郡城樓  
西山應在欄干外注目晴空浩蕩秋



滄水集卷三

欽定四庫全書

集部  
溢水集卷四  
五

詳校官中書臣沈 颺

主事臣呂雲棟覆勘

覆校官中書臣呂雲棟

校對官助教臣汪錫魁

謄錄監生臣黃 佑

欽定四庫全書

淦水集卷四

金 趙秉文 撰

古詩

和淵明擬古九首

亭亭澗底松婉婉窓前柳穠華能幾時不耐風霜久感  
君傾意氣遂託金石友膝上橫煠霜中筵列杯酒酒明  
相知深劒明終不負時運有代謝交情隨薄厚寄言歲  
寒姿枯榮復何有

又

停杯且勿飲  
劒歌已三終  
男兒重意氣  
結髮早從戎  
生當為世豪  
死當為鬼雄  
驚沙射人面  
日暮來悲風  
空卷冒強敵  
力向陰山窮  
仍聞霍嫖姚  
萬騎出雲中

又

小智多自私  
大方乃无隅  
一毫納萬象  
萬象非卷舒  
日月為我牖  
天地為我廬  
曲士窘囚拘  
一身無容居  
我夢登日觀  
青天入平蕪  
俯視但一氣  
一豪彼何如

又

憶昔穆天子侈意窮八荒崑崙入馬蹄仙心厭明堂王  
母為之謠白雲何茫茫憑高俯九州塊如蟻聚場歸來  
越何闕萬墳壓嵩邱遂令學仙子聞風心激昂漢武千  
秋露淮南八公方至今瑤池會空為後代傷

又

客從遠方來氣貌充以完鞍馬光照地怪我儒衣冠問  
君何苦心所慕惟孔顏古豈無賢豪十六子八闕獨攜



無言子流盼青雲端芝蘭吐幽芳山水發清彈願為九  
臯禽接翼萬里驚揮手欲謝客所懼非飢寒

又

吾道無緇磷萬古常如茲奈何中智下謂彼不知時與  
世頗殊好譬如澠與淄我欲質所從登高望九疑路逢  
古漁父長歌滄浪辭出門異所見退坐還自思當世固  
殊古古人不吾欺翩翩出林鳥日暮將何之倚簷送歸  
盡聊欲絃吾詩

又

西北有佳人樓上撫雲和一鼓別鶴搯再弄求凰歌絃  
聲幾欲絕哀音何其多昔為掌中珠今為路傍花壯年  
不再得華落將如何

又

張衡詠思立屈平賦遠遊高情薄雲天意氣隘九州朝  
攀扶桑枝夕飲弱水流翻然不忍去無女哀高丘嚴霜  
下百草歲律聿其周蕭蘭共憔悴已矣吾何求

又

青青一本蘭侯時吾將採不採庸何傷香色終不改太  
陽顏西沉明月生東海日月如飛梭榮華不相待寄言  
紉佩子無貽後時悔

中秋

天風吹河漢明月懸清光清光不可啜流影入杯觴吸  
此風露魄洗我芥蒂腸向來功名心一笑冰沃湯人生  
幾中秌彈指三萬場胡為寘冰炭不使心清涼此心如

秋月虛明動八方此身萬化中太山一毫芒尚無物與  
我何者為彭殤推琴黃葉落搔首白雲翔解衣一盤礴  
清境墮渺茫

重午遊冠山寺

南風搖百草吹我遊山樊青山映華髮似我頭上冠長  
松五月牕戶闕終古不散蒼雲寒步出喬木杪俯視林  
下鞍飛亭枕爽塏更覺天宇寬憑高送遠開心顏白雲  
青嶂非人間深林冥冥白日暮飛鳥裔裔長空閒夕陽

萬里開野色晉趙形勢空河山時清老守容癡頑臨風  
把酒遺巾綸明朝却望題詩處城樓唯見烟中竿

七夕與諸生遊鵲山

七月七日人間秋興來飄然鵲山遊靈仙役鵲渡河去  
白雲嶺上空悠悠手持雲腴酒與雲更獻酬雲既不解  
飲且可與子消百憂不飲我無愁不愁不飲空白頭但  
願年年歲歲得相見長看雲馭織女會牽牛

鵲鷹

臯落秋風暮深崖得爾雛他時萬里翼天末片雲孤何處三窟兔古城千歲狐佇翻壯士臂飛血灑平蕪

遊晉祠

官閑屏騎從意行無澗岡青山盡處山口轉清溪宛與青山長古城尚隔虞叔廟水氣先入單衣涼溪行不十里喬木森千章靈泉萬古流不竭蕩雲沃日搖精光素月落圓甃青天入方塘棹歌中流簫鼓發擊汰驚起雙鴛鴦脚踏船舷腋兩生明月照我歌巾裳兩生為我歌

與子嚼一觴興來灑墨三四行使汝名似湛輩香歌罷  
忽惆悵欲歸且徜徉清風明月本自無盡藏青山綠水  
何處非吾鄉世間風波老可畏物外日月初不忙安得  
此溪化作百斛酒狂吟大醉三萬六千場一朝忽乘赤  
鱗去歸來晉溪流水依舊空茫茫

遂初園八詠

遂初園

人生衣食爾所適飽與溫逮其得志間歸心負初言少

壯慕富貴老大憂子孫此心本無累利欲令智昏嗟我  
復何為未能返邱園外物恐難必開圖對一尊

歸愚莊

平生功名心世路多崎嶇年來忝聞道何者非夷塗莊  
後桑百本莊前芋數區草屋三四間榆柳八九株僮僕  
足使令鷄犬應指呼商鈕向我言官豈不足歟如何天  
壤間不容七尺軀忘身百事懶忘心一物無忘已又忘  
物兀然同太虛不皁亦不昧無毀亦無譽不向醉鄉醉



即歸愚谷愚

閑閑堂

天運如轉轂日月如循環人生天地內頃刻安得閒所  
貴心無事心安身自安低頭拾紅葉仰面看青山朝聽  
新泉響暮送飛鳥還清晨了人事過午掩柴關高非出  
天外低不墮塵寰花落鳥聲寂我處動靜間

翠真亭

修竹百十箇老栢四五行日出煙霧散露葉翻晴光時

攜一壺酒來此據胡床鳥哢白日靜花落春風香君看  
蒼翠間法身露堂堂即物元非真離物又非忘掩卷忽  
而笑風枝奏笙簧

佇香亭

今辰復何辰幽花滿中園愛此風露香聊佇屐齒痕花  
殘蜂蝶逝花開蜂蝶喧物理有代謝花枝獨無言無言  
還有情似訴惟空尊今我不為樂知有來歲存呼兒具  
癭杓喚妾傾瓦盆且盡一日歡萬事不復論

琴筑軒

琴筑雖有韻不鼓則不鳴流水無徽弦使我神慮清風  
月為節奏是中無虧成聊將不俗耳聽此无絃聲無聲  
非無聞聲自根極生隱几以眼聽頽然遺其形少焉性  
空水靈臺湛虛明從渠童子見擲瓦戲清冷

悠然臺

缺

味真庵

缺

南麓畫華清宮圖

天寶遺事今幾年華清樓殿非人間五家羅綺隘山谷  
驅入尺紙天工閑豆分繡嶺線涇渭人物微茫才位實  
想當睥睨下筆時兩眼猶能書細字乃知棘端可以造  
沐猴巧奪造化非人謀胷中度世乃吾事坐令千里當  
雙眸明皇初心小姚禹肯比金陵一孱主一盼聊為妖  
姬留奈何坐此覆神州太白西去有烏道蜀山秦樹令  
人老浮雲一蔽漁陽城祿山馬飽宮前草恩流四海一  
玉環胡兒不合窺潼關至今脂澤下蟾口時有飲鹿疑

神姦豈知水洗凝酥滑一掬傷心馬嵬血多年鬼火化  
為碧迂遶離客送行客龍岩幾度過華清筆端山高水  
泠泠嗚呼興廢今已矣祇有丹青留典刑畫時雙絕兼  
書工留傳遜公到松公今年盜入媯川東火燒塢寺一  
洗空松公間闕來帝里一身與畫同生死吾聞挈瓶之  
智不假器支郎大勝潼關騎

跋武元直漁樵閑話圖

兩翁久忘世木石以為徒偶然相值遇風月應指呼廢

興非吾事胡為此區區但覺腹中事似落紙上圖一以  
我為漁神遊渺江湖一以我為樵夢為山澤臞形骸隨  
所寓何者為真吾尚忘彼與此况復朝市娛西風下落  
日渡口炊煙孤無問亦無會長嘯歸來乎

就劉雲卿第與同院諸公喜雨分韻得發字

君家南山有衣鉢叢桂分香老蟾窟從來青紫半門生  
今日子孫滿床笏爾來先生復秀出論事觀書眼如月  
豈惟傳家秉賜彪亦復生兒勗勗往時嘗乘御史驄

未害霜蹄聊一蹶雙鳬古邑試牛刀百里治聲傳馬卒  
今年視草直金鑾雲章妙手著揮發老夫當放一頭地  
有慚老驥追霜鷗座中三館盡豪英健筆縱橫建安骨  
已知佳會得四并更許深盃辭百罰我雖不飲願助勇  
政要風燈照華髮但令風雨破天慳未怕歸途洗靴鞢  
九日登繁臺寺

九日獨何日寒花發幽芬澄波無餘滓天清廓遊氛鵬  
盤翼迅風鴻響厲層雲我與二三友意適同酣醺南登

歌吹臺一弔信陵君捐軀赴趙壁談笑却秦軍夷門今  
安在草沒侯嬴墳我亦感激士白首羞論文禁中有頗  
牧慷慨志奇勲登臨送將歸無為愴離羣蒼茫視八極  
烟靄何紛紛懷士撫長劒悵然日西曛

伯勝九日詩蕭然有陶風趣次韵

九日獨何日高懷無與娛仰視天宇清倏見飛鴻孤哀  
嗚呼其羣相望邈江湖豈不念親友林間置尊壺不醉  
慎毋歸且莫歌驪駒今日不為樂奈此歲將徂風霜艷



黃菊興與南山俱此時如不採但恐隨樵蕨日暮登吹  
臺蒼茫望八區翻然念鄉國北望一長吁

送雷希顏之涇州錄事

東風吹百草搖落鴻鵠心翩翩萬里翼隨雲落西南涇  
水東流不到燕送君落日孤雲邊聲名一日天下白還  
作南樓座中客西州自古多豪英作者凜凜氣猶生太  
尉英風萬萬古不勞折箠答此虜男兒生不功名死無  
益莫言簿領卑凡職當時髯張一令耳至今雙廟令人

起

倣玉川子沙麓雲鴻硯屏呂唐卿藏

吾聞春秋紀年二百四十二不書祥瑞書災異不知何  
年沙麓崩六鷁過飛失其四恒星不見夜有光星殞如  
雨石在地孔子諱魯不諱宋但記有月食之既豈知淪  
影入石中蟾蜍桂影俱蒙籠初疑日中有兩鳥雙飛跳  
入姮娥宮鷄火賁賁尾伏辰狀如赤鳥雲非雲女媧煉  
就五色石搏沙欲作愚下人史蘇發占文端策坎為白

月艮山石允升而雲離奮翼重兌為呂歸有德呂侯寶  
石到子孫更遣趙子窮其源齊趙馬牛不相及如何窮  
此造化根世間萬事何不有耳目之外難具論海中時  
時發火焰世界一一持風輪一微塵內幻須彌有頂天  
上猶崑崙併却咽喉與唇吻別有一句超乾坤木人撫  
掌非耳聽石女懷胎親眼聞扇子築著帝釋鼻鯉魚驚  
翻東海盆吾言非夸子夸矣要與摩詰無言言

傲樂天新宅

吉凶翻覆兩何如  
新貴移來舊貴居  
昨日弓刀圍舊宅  
今朝車馬慶新除  
兔驚尚顧罝中兔  
魚逸還尋簞下魚  
富貴貧窮皆有命  
大都覆轍戒前車

倣郎士元寶刀塞上兒

長安美少年  
白馬黃金鞭  
後騎捧長劍  
官儀如殿前  
煙塵生絕塞  
烽火照甘泉  
如聞辭第將  
遺貌上凌烟

從軍行送田琢器之

嚴風吹霜百草枯  
胡兒馬肥思南驅  
長戈飛鳥不敢渡

扼胡嶺下行入無鉤鈐一夕妖星過賊臣自掣居庸鎖  
藏金郿塢未厭深長安三日燃臍火胡兵數道下山東  
旌旗絳天海水紅胡兒歸來血飲馬中原無樹搖春風  
索馳羶車載金帛城上官軍空嘆息纍纍婦女過關頭  
回望都門心斷絕漢家公主嫁烏孫聖皇重戰議和親  
北望地名一舍如天遠黃沙茫茫愁殺人田侯落落奇男  
子主辱臣生不如死殿前畫地作山西請以義軍相表  
裏恨我不得學李英愛君不減侯莘卿子明又請當一

面禁中頗牧皆書生

是時李英子賢侯摯莘卿  
王晦子明方出戰有功

橫遮俘

戶三千萬潼關大笑哥舒翰三書慷慨請長纓臨風鏃

翻空三嘆

題楊秘監雪谷曉裝圖

林空月已沈雪落風未掃束裝事晨征之子涉遠道心  
知馬上人萬象入腹藁髯奴亦可人行李伴幽討塵中  
無此客風雲滿懷抱逢辰則伊呂不然商山皓如何苦  
憔悴薇蕨不得飽前身孟浩然後身窮賈島三生紙上

形千古笑枯槁向來富貴骨露濕原上草百年等一夢  
翻覆無醜好那知風雪癯不是蓬山老所以邢和璞一  
笑幾絕倒

題魯直書黃庭經

太清虛皇玉景經琅函瓊笈秘始青囊以雲錦金鈿局  
四神守衛呵百靈中夜一氣存黃庭玄霜瓊膏灌子形  
方瞳綠髮魂魄寧上壽千歲下百齡天書夜降勅六丁  
控駕三素乘風冷鳳笙龍箎超冥冥揚旌抗旆燿飛星

八威吐毒驅電霆擲火萬里流金鈴仙人拂石矧不停  
笑視人世風中螢世間醉夢紛羶腥三尸調汝丹田螟  
有如尾閭泄滄溟一朝神離鳥飛瓶涪翁書法出蘭亭  
名書此經實自銘開卷恍然如酒醒養生新發庖丁斲

試院中愁坐叔獻學博忽送紅梅小桃數枝坐念  
春物駘蕩西園開鑰不得一觀作詩破悶兼簡

張文學仲山

數日天氣殊未佳文書如山眼生花忽遣官梅入吾室



政爾東君解留客蠟梅無韵空有香紅梅亦復清而莊  
此花韻勝開較晚天許風流嫁海棠海棠春嬌睡未足  
環兒酒暈紅潮玉不應更有林下風翠袖天寒倚脩竹  
銀瓶亦有小桃枝茜裙游女窺荆籬青枝綠葉不須問  
自有月影溪光知冰花不肯相媚嫵來伴詩人作詩苦  
橫斜影落水心中融入詩中作奇語古來詩人例多窮  
把酒對花酒已空亦知寒食只數日醉夢不到西園中  
天上公子被花惱一笑回波嘲桮棹不須區區索酒錢

但可煎茶對花前

慧林賦海棠

君不見三郎花下吹觥栗  
寧王搦管番綽拍一聲驚夢  
破華清海棠頓覺無顏色  
又不見百花潭北西郊路  
醉裏花僊覓奇句覺來酒盡  
花已空詩人不是無心賦梨  
園富貴春蕭瑟空對畫圖三  
嘆息杜陵誰有補亡詩坡  
仙詩中畫更奇君不見西園  
往日稱繁雄羅衣不復能  
春風雄樓傑閣春色裏溫馨  
淑氣月明中纖條嫋嫋春

無力猶遶空牆絆游客不應折贈寄禪房來與幽人慰  
岑寂石門老衲僧中癰鼻端苦覓香有無何似東庵人  
散後月斜踈影照跣趺

冷巖行

禪房閣雨鑠春陰幽人切切鳴幽琴一聲兩聲風蕭森  
三弄五弄天沉沉紛紛十指終不亂雙鸞對舞揚哀音  
初為湘靈怨再鼓別鶴吟絃聲按抑止復作忽然變態  
窮巖歎曲終從容奏恬淡落花啼鳥青春深苗夫子吾

獨知爾心胡為翻作冷山搯此意似欲為師箴昔年憶  
侍明光宮曾以絲桐沃舜聰薰風一曲巖廊靜萬國無  
為至化中明昌有道真重瞳重瞳左右多夔龍朝廷詔  
起冷巖公鼎湖龍去弓劍空不聞天寶相國忠漁陽馬  
嘶旌旗紅聖主中興日月功首誅羿浞鉏羣兇張公上  
書見大計臣以琴諫非琴工先生年來到骨窮但願四  
海無兵戎夜闌更靜彈三樂臣獨飢寒亦不惡

和淵明歸田園居送潘清容六首

身行半天下何處無名山蘇門天下勝築室不待年曩  
時孫公和今代潘子淵無家安四壁治生惟寸田去國  
行萬里往寄茅三間山川半豺虎一水不得前寄謝李  
龍眠為我寫風煙曲肱畫圖裏臥遊西山巔尚恨畫中  
隱不得招閑閑有願何必遂古人豈盡然

又

人生本無累世路自羈鞅悠悠塵中境翳翳霞外想蘇  
門有佳處悵望不得往遙知西山下烟雨蔽蔽長有願

神莫違誰謂河水廣夢逐西飛鳥一夕騎渺莽

又

萬國角聲裏日暮行旅稀幽人如野鶴思逐南雲飛冥  
冥花經眼列列風吹衣平生香火願毋使寸心違

又

堂堂鵠林師法喜以為娛談道有源委百川會歸壑城  
市俛莫留野性山林居年荒拾橡栗濕柴燒樛株尚憐  
陶與陸問訊今何如當時蓮社人寥落今幾餘脩靜復

西去而獨逃空虛藍輿會相訪容我醉時無

又

昨日遊東城今日復南陌偶逢素心人把手便歡適一  
談復一笑不覺日西夕騎馬穿市橋矯首望林隙歸來  
掩關臥尚恨為物役四論喜僧肇玄文箋陸績會當投  
絕學繕性終何益

又

駕牛函谷關跨鹿渦水曲相期無翼飛豈不賢尊足他

年東坡翁一衲歸玉局相衰老不死分我一寸燭千年  
暗室中一旦得朝旭

題巨然泉巖老栢圖

雪巖森危有老栢幾度寒泉漱秋月氣凌層空白日寒  
根貫斷崖蒼石裂奔騰逝水送流光剝落古苔封老節  
明堂未作棟梁材潦倒風霜半無葉何人宵次富泉石  
巨然袖中董元筆崖傾岸絕無人見夜半移舟真有力  
賢侯筆力今曹植氣象參天二千尺為回筆力挽萬牛



頓覺烟嵐少顏色

夢登華山

夢登蓮華峰舉手摩青天道人洗我心相與掬飛泉風  
吹青霞佩飄若雲中仙下視塵世人擾擾紛腥羶直欲  
叫蒼穹生靈日熬煎安得側仙掌狂瀾迴百川一洗邊  
塞塵萬騎還全燕功成不受賞棄之若浮烟金膏換綠  
髮玉液煉丹田金丹如可冀脫屣區中緣閑尋碧玉調  
朗咏青苔篇還騎雙白鶴飛下青山巔

尚書右丞侯公雲溪圖

朝遊雲溪上暮遊雲溪下不知雲溪雲去作人間雨流水赴大壑白雲思故山何時溪上人心與歸雲閑黃公山下雲溪路十里溪光照雲樹溪流瀝瀝讀書聲想見先生舊游處溪上老僧今白頭尺書招我歸來休圯上方傳黃石畧山中未暇赤松遊我公昔年提孤軍旌旗絳天張魚鱗鯨鯢沸天海水渾罵賊嚼齒欲透斷旄猊十萬寄一身咸陽白骨迴青春九重嘆息天為顰殿前

論事氣益振滄海未全歸禹貢山東且願變齊民匣內  
寶書金屈戌腰間瑞節玉麒麟衛國錦衣歸故里代公  
黑髮更慈親他年鐘鼎書元勳二十四考中書君整頓  
乾坤濟時了飄然却返雲溪雲

過廣武山

塵霾晦金鏡鹿走羣雄馳龍騰海水沸虎怒風林披成  
臯天下險楚漢昔相持乃翁一杯羹且欲共分之兩雄  
不並立鴻溝徒爾為襄創撫戰士智勇亦已疲滎陽非

吾厄帝圖乃天資陰陵夜失道慷慨兒女悲長陵一坏  
土笑煞牧羊兒勝負兩蝸角興亡一枰碁而况彼區區  
二蟻爭雄雌西登廣武山曠望大河湄野曠知天迥崖  
傾覺岝危青山明劍戟霜林列旌旗雲槎秋浩渺煙樹  
晴參差淒涼阮生嘆曠蕩謫仙詞懷古念離散興極淚  
還垂

河中八詠

舜井

一水獨冷然浮雲幾變遷  
心知思舜處時見井中天

夷齊墓

讓伐理難全求仁豈怨天  
乾坤吾道獨宇宙此山傳  
不肯食周粟猶應飲舜泉  
冥鴻飢欲死落日咲昏煙

鸛鵲樓

樓成鸛鵲幾時還人去樓空境自閑  
地接連城秋水渡河分兩岸夕陽山  
汀烟萋萋分秦樹隴鴈依依度晉關  
千古廢興還造物暫攜風月出塵寰

逍遙樓

黃河城上逍遙樓何人能作逍遙遊  
斷霞落日今猶古明月清風春復秋  
千里兵塵常漠漠五年心事謾悠悠  
中條太華不忍見雲自高飛水自流

汾陽王像

天寶虜騎興漁陽首提孤軍起朔方  
掃除撓搶廓氛翳再使日月光吾唐  
丹青凌煙誰第一功業汾陽異姓王  
當時太尉亦雄偉天不憖遺壯士傷  
河中重鎮甲天下

渾公與公屹相望時危英雄常恨少撫壁再拜涕泗滂  
諸酋下馬識君否公雖云亡像在堂

吳生畫

吳生大士十六像歲久塵昏蛛網絲真物從來有真賞  
息軒為作證明師

楊惠之維摩像

一默傳心已失機更求形似轉成痴至今遺像兀不語  
猶似當初問法時

先公碑

過客紛紛總不知先公事迹竹溪碑坡軒不薦山僧意  
也覓西廂待月詩

汾陰祠后土

閑閑吏隱官蓬萊玉堂給札非仙才封香汾陰祠后土  
騎士引赴軒轅臺龍門峽束天下險狀如萬頃納一杯  
方邱中峙巨鼇趾黃河一箭從天來長風吹雲碧海去  
曠蕩萬里晴天開青山終古不改色下送落日浮金壘



滄波幾回照新鴈往日繁雄安在哉君不見漢家六葉  
誇雄材力通象郡臣龍堆泰山日觀封禪罷屬車九  
聲如雷橫汾中流簫鼓發酒酣樂極情生哀秋風一曲  
在人世茂陵桂樹空莓苔又不見開元四海不動塵千  
麾萬騎祠神睢侍臣文章咸第一豐碑自勒饒崔嵬憑  
高慨詠才子句山川滿目空塵埃鈴聲淋浪蜀道雨想  
見萬里愁雲迴蒲關北走滎河道巖深地古令人老胡  
兒夜渡黃河水生人憔悴如霜草吾皇神聖如軒轅北

伐獫鬻清中原徧秋羣神禮喬嶽還因吉土祀坤元靈  
祗紛紛福來下倒卷天河洗兵馬垂新日月照乾坤再  
整山河歸廟社三河形勢滿河中獨紀葵丘第一功唐  
漢遺民尋故事還思法駕幸河東

會靈觀即事二首

戊寅五月十六日試宏詞

靈宮初雨餘散策步幽徑深樾不見人微風度踈磬心  
閑偶無事虛極自生聽時復靜中喧歸禽暮爭暝

其二

欹枕北窗風書葉久未定午夢破華胥起看松陰正開  
居觀物化靜處見天性鳴鳩亦何為谷谷自相應

題東坡石鐘乳山記墨蹟

書為水漬幾半

東坡謫齊安人怒神所許倒騎臥水龍醉踞石頭虎赤  
壁萬里江一葉吾敢侮歸來抵湖口此樂乃并與扁舟  
絕壁下鸛鶴如人語風雷相轟逐水石效吞吐山遺洞  
庭樂帝下釣天舞石鐘不吾欺一證萬萬古遺墨落入  
間訛缺十四五糝糊魯壁簡剥落岐陽鼓蜿蜒半鱗甲

尚恐脫風雨畫移瓦棺壁劍化平津渚祝君什襲藏隄防六丁取

武元直畫喬君章蓮峰小隱圖

武君非畫師勝槩飽胸臆太華五千仞驅寫入盈尺飛泉峰頂來落我松下石清風忽吹散琴上濺餘滴呼兒急寫之指下淋浪濕未知責子翁頗復有此適何時圖中人真作林下客青山不違人但恐富貴逼勇退良獨難此願誰能必向來燕趙間逆旅拜真逸兒時弄琴者

天涯老相識俛仰四十年父子埋雙壁卷中題詩人十  
九已仙籍年光飛鳥過紙上但陳迹對此還自傷何事  
為物役還丹日月遲白首先陰疾文章真小技身外皆  
長物拂衣歸去來蓮峰入心碧

中元夜祭太乙罷對月二首

今夕知何夕白露涵秋空褰衣踏明月如在瓊瑤宮細  
數秋兔毫桂樹何玲瓏當年誰所種鑿此天公瞳清光  
知人意飛影入杯中流霞酌不盡清光浩無窮我欲逝

白雲一訪東坡翁扁舟下赤壁此樂將毋同疇昔縞衣  
仙化作羽衣僮酒酣邀我去鶴背冷松風

其二

靈官夜醮餘香霧飛不起更衣步石壇風露浩如洗月  
波走金蛇入我清尊裏引杯不復疑弓影正如此夜深  
羣鴈過歛見巾落几松間龍一吟風庭應落子空中步  
虛聲隱隱猶未已

東軒老人河山形勝圖

太虛匠流峙造化誰胚胎洪荒萬萬古至今餘劫灰黃  
河發崑崙匣怒不敢乖初經龍門天下險勢如萬頃納  
一杯桃花浪激不得上凡魚幾曝鱗與腮下趨神隄如  
地底終古不到軒轅臺蒲津沉沉臥虹影鐵牛駕浪輸  
黃能千里一曲復一曲傾山倒岳不復迴巨靈運東肘  
首華為崩摧茅津濟師想勝概搔首北望令心哀萬派  
赴集津鼓聲如會垓神斧忽中斷鑿鑿何年開崖傾路  
斷飛鳥絕輕舟一箭浮天來篙師絕叫未及瞬回望已

失雲濤堆但見兩厓蒼蒼半天外三門斗落如驚雷擘  
窠大字誰所銘高山百丈磨蒼崕廟前劉公一片石龜  
龍剝落生莓苔東軒先生生長三晉地回視韓魏空浮  
埃想像舊游處落筆如山顏曾中原自有河山寫出勝  
概何壯哉餘波到諸郎直氣凌斗魁況復文章妙天下  
睥睨晁張輦蘇梅竹帛如山不經國安用江鮑稱詩材  
劉夫子我有一杯酒澆汝曾崔嵬嗚呼聖道久榛塞孟  
氏闢路誅蒿萊諸儒辛苦補罅漏未見巨手如排淮後



生索塗方擿埴雖有耳目如嬰孩祝君頽波作砥柱驅  
入聖海無津涯劉夫子深藏什襲作龜鏡先君此圖吁  
可懷

春雪

幽窗不知春但覺寒轉加開門散飛雪帶雨不成花盤  
空飛瓊舞作態正橫斜著樹斲玲瓏少焉委泥沙急掃  
枝上玉為我試新茶不須待明月湯好客更佳

同英粹中賦梅

寒梅雪中春高節自一奇人間無此花風月恐未宜不  
為愛冷豔不為惜幽姿愛此骨中香花餘嗅空枝影斜  
清淺處香度黃昏時可使飢無食不可無吾詩

淦水集卷四